

'I PIGNATEDHA

Unu vicinu a l'atru , 'ncumpagnìa ,
cu ccrita russa , nostra , frabbicàti ,
a lu focu mentùti li vidìa
li pignatèdha tundi , 'mpommicati

L'acqua 'ntra unu nc'era pe accivàri ,
'ntra l'atru la surghiàca si cocìa
Cu ppetrusinu dintra , mu cumpàri
E hjàvuru mu spandi pe la via.

Supa a lu foculàru cu ddu' bbrasi
E quattro ligna ch'èranu tizzùni ,
ti venìa lu disiju mu l'abbàsi
li pignatèdha , comu a ddui perzùni.

T'èranu cari , li vidivi sempì ,
di la matina finn'a menzìjòrnu ,
li pignatèdha tundi , d'atri tempi ,
cu ttia cotràru chi ggiràvi 'ntornu.

Ogni ttantu la mamma s'addunàva ,
aggiungìa l'acqua , nci smovìa lu focu
e, senza la cucchiàra , miscitava
dàndunci 'n'assaccàta a ppocu a ppocu..

E ttu cotràru no mbidivi l'ura
La tavola mu trovi apparicchiàta ,
li mani ti lavavi cu ppremura ,
hjuhjhàvi 'nta la prima cucchierinàta.

Altri tempi , atri usanzi , atri costùmi !
Lu foculàru e mmortu cu la fiamma
Mma tu vorrissi ancora pemmu adhùmi
Lu bbellu focu chi ffacìa la mamma ;

pemmu menti vicinu a ddu' tizzùni ,
li pignatèdha tundi , 'mpommicati ,
mu vai comu na vota mu t'addùni
se manca l'acqua , se bonnu accivàti !

Francesco Laruffa

www.associazionelaruffa.org